

David Beuthers Bericht / deß Einbringens halben / wie solches gemacht muß werden.

Gnädigster Churfürst vnd Herz / demnach E. Churf. Gn. vor mir begert / vnd befohlen haben / E. Churf. Gn. das Einbringen zuberichten / mit dem Antimonio / sollen E. Churf. Gn. hiemit zum vnderthänigsten von mir / als mir wissenlichen ist / selbstenn dann also gnädigst vernehmen / als nemblich / ich nehme Schwefel meines gefallens / zerbrich oder zerstoße ihn auff das kleinste / thue ihn in ein irden verglast Gefäß / geuß darauff ein warm wol siedig Wasser / rühre den Schwefel darein wol herum / so solches geschehen / laß ich es ein wenig stehen / geuß bemeldes Wasser davon wider ab / geuß widerumb warm Wasser darauff / das thue ich dergleichen wie bemeldet worden / ein mahl oder drey / so solches geschehen / nehme ich den Schwefel / geuß darauff ein gemein Wasser / darinnen ein Salpeter auffgelöset worden ist / solches Wasser geuß ich auff den Schwefel / vnd laß es also Tag vnd Nacht darauff stehen / vnd rühre es wol vmb / alsdann so solches geschehen ist / setze ich das irdene Gefäß vber ein Kohlfewer / so der Schwefel darinnen ist / vnd laß ihn mit dem Salpeterwasser wol einsieden / vnd drucken werden / solchen Schwefel behalte ich / vnd brauche ihn / wie E. Churf. Gn. gnädigst ferne vernehmen werden / das ist der Schwefel / mit dem Eysen gebäre ich also / Ich nehme Eysen auch meines gefallens / thue solches in ein Glas / wasche bemeldes Eysen darinnen mit Wasser fein rein ab / so solches geschehen ist / geuß ich darauff 2. theil Wasser / vnd ein theil schlecht Scheidwasser / vnd thu darein ein handvoll Salt / laß es also soluiren vnd stehen / biß es von sich selbstenn auff gesolürt hat / alsdann so solches geschehen ist / geuß ich obbenandtes Scheidwasser / vnd das ander Wasser widerumb ab / hebe alsdann die hinderstellige Materia / welche ganz Gelblich ist / auff / vnd gebäre also hiemit. Ich geuß darauff ein schlecht Wasser / das vber die Materia guter drey Finger hoch gehet / in einem Topff / ist der Materia nun viel / so nehme ich desto mehr gelbes Wachs / vnd laß es also mit einander ein coaguliren / Als ich setze drey theil der Materia / vnd zwey theil Wachs / vngesehr also bereit ich das Eysen darzu / solches Eysen gibt mir zween nutzen / Erstlichen bekomme ich die innerliche Röthe auch / die ich alsdann zum Jone brauche / oder haben muß / wie E. Churf. Gn. zuvor berichtet seynd / das ist die ander Species.

Die